

# Mario Pacchioli retschaiva il premi da la SRG.R 2011

■ (cp) **Mario Pacchioli, Rabius/Paris, retschaiva il premi da la SRG.R 2011. Quest premi è dota cun 8000 francs. Il premi vegn surda a l'onurà a chaschun da la radunanza generala da la SRG.R, la societad purtadra da RTR Radiotelevisiun Svizra Rumantscha, venderdi, ils 20 da matg a Domat.** Cun quest premi undrescha la SRG.R *Mario Pacchioli* per sia lavur exemplarica e cuntinuanta per la cultura da chant, musica e teater e per sia expressiun artistica genuina ed autentica. Mario Pacchioli è naschi ils 22 da matg 1981 e creschì si a Rabius. El ha frequentà il seminar scolastic a Cuira e terminà quel l'onn 2002. Silsuenter ha el dà scola a Sumvitg fin 2004. Durant trais onns è el musicist da professiun e da 2007 enfin 2009 redactor da musica tar il Radio Rumantsch en piazza parziala.

Dapi ses onns d'uffanza e giuventetgna fa Mario Pacchioli musica. Las emprimas registraziuns dad el en l'archiv da RTR dateschan dal 1994. *Giusep Giuanin Decurtins* ha registrà lezza giada Mario Pacchioli a la Gehla, accompagnà al clavazin da *Clau Scherrer*: La filiera da Dolf, Andiam, diletta mita ord La grotta azzura e la chanzun da durmentar da Brahms.

Paucs onns pli tard, 1998, chanta el en il terzet Maconga cun sia sora *Corina* e cun *Gaby Degonda*. Maconga ha success e fuola via al MusicStar, la gronda emisiun da SF. Tar quest emprima ediziun da MusicStar vegn Mario Pacchioli la primavaira 2004 sin il segund plaz, sia popularitad è enorma, la vischnanca da Sumvitg ed il vitg da Rabius retschaivan el en charrotscha cun gronda pompa. I suonan onns

d'activitad sco chantatur e musicist da professiun. Plirs portatuns cumparan.

Il quatter mais al Musicians Institute of Technology a Hollywood l'onn 2006 madiran en Mario Pacchioli in'otra avaina artistica: quella da far teater. La stad 2009 brigliescha el sco Puck en l'inscenaziun da *Bruno Cathomas* en il teater «In siemi dalla notg sogn Gion» da William Shakespeare a Laax. Quai è l'entschatta d'ina nova via: Mario Pacchioli va a Paris e frequenta la scola d'actors «Academie Internationale des Arts du Spectacle». Là è el actualmain. Da là anora fa el enavant musica tant en Svizra sco er en Frantscha. Uschia ha el 2011 in contract permanent en il renumà «Le Théâtre des Blancs Manteaux» cun ses program «Rispondas» e cun sia cunchantadura *Astrid Alexandre*.

**Mario Pacchioli  
vegn onurà per ses  
engaschament sco  
chantatur, musi-  
cist ed actur da  
teater.**

MAD

